



9. august 2013

UKA2013/69

Inatsisartut Suleriaasianni § 33 naapertorlugu aalajangiiffigisassatut siunnersuut imaattoq matu-muuna saqqummiupparput:

Ingerlatseqatigiiffiit tamakkiisumik ilaannakoortumilluunniit akiliisartut il.il. eqqarsaatigalugit ingerlatseqatigiiffinnut akileraarutip 1. januar 2015 aallarnerfigalugu 20 %-nut appartinnissaa pillugu kingusinnerpaamik UKA2014-mi inatsisip allangortinnissaanut siunnersuummik saqqummiusseqqullugit Naalakkersuisut peqquneqarnissaannik Inatsisartut aalajangiiffigisassaattut siunnersuut.

(Inatsisartunut ilaasortat Jens B. Frederiksen aamma Andreas Uldum, Demokraatit)

Tungavilersuut

Demokraatini siunnersuut manna siunnersuutigaarput maani nunami inuutissarsiorneq nukittorsarumallugu. Isumaqarpugut namminersorlutik inuutissarsiorlut nukittuut tassaasut aningaasarsiorneq nammineernerulernissatsinnut tungaviliisussat kingornalu namminersulivinnissatsinnut. Taamaattumik inuutissarsiorlut namminersortut nukittorsarnissaat Demokraatini pingaartipparput.

Ingerlatseqatigiiffiit akileraarutaannik appaanikkut suliffeqarfiit pioreersut unammillersinnaassuaat periarfissaallu pitsanngorsassavagut. Suliffeqarfiit periarfississavagut patajaallisarnissaannut ineriartornissaannullu, nutaaliornissaannut minnerunngitsumillu aningaasaleerusussusaasa uummarissarnissaannut. Piffissaq qaninnerusoq eqqarsaatigalugu suliffiit amerlanerusut pilersinneqassapput taamaasiornikkullu inuiaqatigiit aningaasarsiornerat tamakkiisoq pitsanngorsarneqassaaq.

Ingerlatseqatigiiffiit akileraarutaannik appaanerup kinguneranik aamma nunani allani najugallit nunatsinni aningaasaleerusussuseqarnerat uummarissarneqassaaq. Ingerlatseqatigiiffinnut akileraarutigitarput nunanut assigerusutatsinnut unammillersinnaangilaq. EU-mi nunani ingerlatseqatigiiffiit akileraarutaat agguaqatigiisillugu 2012-mi oktoberimi 23,5 procentiuvoq. Danmarkimi ingerlatseqatigiiffiit akileraarutaat 22 procentiuvoq. Nunami maani ingerlatseqatigiiffiit akileraarutaannik 20-nut appaanikkut aningaasaliisussarsiorneqarsinnaannut unammillersinnaassuserput pitsanngorsarneqassaaq.

Ingerlatseqatigiiffiit akileraarutaat apparneqarpat imaattariaqanngilaq pisortat karsii annasaqassasut. Paarlattuanik pisoqassaaq. Danmarkimi inuutissarsiorlut nutaarsiassaatiiminni ”Dansk Erhvervs Perspektiv”-imi allaaserisaat qulequtserneqarsimavoq ”Ingerlatseqatigiiffiit akileraarutaat appasinneq niuernitsialaavoq” allaaserinnittuullutik Dansk Erhvervimi skattepolitisk chef Bo Sandberg aamma Dansk Erhvervimi makroøkonomisk medarbejderi Matthias Borritz Milfeldt.



Nassuiarneqarpoq, 80-sikkut qiteqqunneranniilli aningaasarsiornikkut ajornartorsiulernerup tungaanut Danmarkimi ingerlatseqatigiiffiit akileraarutaata BNP-mut sunniutaa annertuseriarsimasoq ingerlatseqatigiiffiit akileraarutaata apparnera peqatigalugu. OECD naatsorsugai naapertorlugit ingerlatseqatigiiffiit akileraarutaat 1987-mi BNP-mut 2,1 procentit missaanni sunniuteqarsimavoq. Tamanna 1991-mili qaffariartulersimavoq 2006-milu qaffasinnerpaagami BNP-p 4,3 procentianik annertussuseqarsimalluni. Taamaasilluni ingerlatseqatigiiffiit akileraarutaata Danmarkimut sunniutaa ukiut 20-t missaasa ingerlanerini marloriaatinngorsimavoq. Tassungalu atatillugu soqutiginartortaavoq, ukiut pineqartut 20-t missaasa ingerlaneranni ingerlatseqatigiiffiit akileraarutaat milliartorsimammat. Tassami 50 procentiniit affaannangortinneqarpoq, suliffeqarfiit sinneqartoortimik 25 procentiinik akiliisalernikummata.

Demokraatini tamatumunnga atatillugu nalunngilarput 80-sikkut qiteqqunneranniit aningaasarsiornikkut ajornartorsiulernerup tungaanut ingerlalluortoqarnikummat, tamannalu soorunami ingerlatseqatigiiffiit akileraarutaatigut isertitanut pitsaasumik sunniuneqarnikuuvoq, ingerlalluarsimanerli kisimi ineriartornermut allaaserineqartumut pissutaanngilaq. Ingerlatseqatigiiffiit akileraarutaat appasinneq allatut oqaatigalugu nammineq akiliisinnaassuseqarnermut tunngaviuvoq.

Demokraatini neriuppugut siunnersuuterput Inatsisartuni ilassilluarneqarumaartoq.

Pisortanut aningaasaqarnikkut allaffissornikkullu kingunissai.

Siunnersuut pisortanut aningaasarsiornikkut allaffissornikkullu kinguneqassaaq. Ajornakusoorporli oqaatigissallugu pisortat qanoq annertutigisumik annaasaqarumaarnersut. Aamma ilumut ajunaaruteqartoqassanersoq oqaatigiuminaappoq. 2006-mi ingerlatseqatigiiffiit akileraarutaat 35-niik 30-nut appartinneqarpoq. Taamani Naalakkersuisuusut taggippaat Landskarsi ukiumut 26 millioner koruuninik ikinnerusunik isertitaqartalerumaartoq. Naalakkersuisut akissutiminni qinnuigineqarput nalilersoqqullugu taamani taggiineq qanoq ilumoorsimatiginersoq. Tamatuma saniatigut siunnersuummut tunngavilersuutigut innersuussutigssavakka, tassani siunnersuutip aningaasatigut kingunissai aamma oqallisigineqarput.

Namminersorlutik inuussutissarsiortunut aningaasaqarnikkut allaffissornikkullu kingunissai.

Ingerlatseqatigiiffiit akileraarutaasa 30 procentiniik 20-nut procentinut appartinnera suliffeqarfiit aningaasaqarnerannut pitsaasumik sunniuteqartussaavoq, naatsorsuutigineqassaaq akileraarutit akilereerlugit sinneqartoorternerusalernissaat.

Innuttaasunut aningaasaqarnikkut allaffissornikkullu kingunissai.

Innuttaasunut aningaasaqarnikkut allaffissornikkullu kinguneqassanngilaq.